

二人城內楊氏一人以上七縣係原有疫地方自六日至十日新死者十四人神池補報四十四人省北前發現疫氛之二十五縣據報撲滅者已居多數而省東南之武鄉縣忽於虞日報稱南峪村疫死程東來及其弟程永來程新來其子程奴兒永來之妻黃氏又黃泉兒及其表弟五貓兒七人分水嶺疫死賈天海一人泉則溝疫死郝四兒郝月更郝海流郝來潤郝更喜之妻又孫萬村等七人詢其傳染原因係腳夫張學兒在分水嶺程東來店內打尖程奴兒食其餘餅得病三日而死致傳染多人已飭將各該村交通遮斷由省派西醫前往檢查實行隔離從速撲滅并潞沁遼各舊屬及祁縣太谷等縣與武鄉毗連各口遮斷交通嚴加防範以杜蔓延同上

三月十四日

蒸電內新染疫之武鄉縣近日平靜分水嶺虞電原報尚有楊世富及其妻二人此外神池補報二月七日黃兒窰村疫死崔七金等十二人偏關報稱三月三四等日四眼井村疫死吳五家屬七人左雲報稱六七等日周家窰鹽圪塔村外路斃直隸客民一人黃家店疫死吳先生李國楨李守謙陳三陳四張九齡王七仔裴姓等八人右玉報稱十日紅旗口疫死寧遠旦一人寧武報稱十日十一日趙家溝疫死孫七七及其母與其舅殷世保三人自真日至寒日據報新舊疫死者三十五人同上

三月二十二日

據武鄉報稱疫氛多日未發二月二十三日以前南峪村疫死程楊氏一人毛兒尖疫死孫萬財妻張氏一人泉則溝疫死王成寶郝月更之幼子郝苗則及母周氏與福生仔五人前後共疫死二十四人餘無傳染

代縣補報二月間雁門關山溝內康坊村疫死段三富家屬及同居周金娃高雙喜等男女十人五寨補報鼓樓溝村外賈樓村外各路斃一人右玉報稱三月十六日宋家村疫死李榮先一人十七日孫村隔離所疫死石甯氏一人寧武報稱三月九十等日趙家溝疫死孫七七之父孫三拴弟孫來寬孫潤五孫四滿孫五滿及其外祖母殷王氏舅母殷王氏表弟殷上舫等八人應縣報稱三月十六七等日西朱莊疫死鄭天雲王應山鄭爲鄭岩鄭六旦王李氏王張氏鄭寶華鄭女仔鄭張氏鄭大女王小女鄭王氏王長山等十四人自銑日至養日據報者七縣補報者十九人新死二十四人同上

四月二十三日

晉省有疫各縣自三月二十二日養電報告疫死人數後傳染者日見減少至四月上旬始一律肅清內地交通前已分期開放惟邊牆各口迭據大同鎮道及各營縣查報綏察兩區疫尚未清仍令檢查以昭慎重嗣准諫電復於四月十九日電令將沿邊各檢疫所一律撤銷各縣亦先後分令結束有疫者共二十八縣除將結束詳情分飭趕辦彙案陳報云云同上

### 第三項 外省致督軍兼省長電

一月九日 察哈爾電

陽電敬悉疫患東來豐鎮爲鐵路終點亟應預防現已由部派醫官在該縣設立防疫病院此外殺虎口石匣溝沙袋溝及清水河右玉縣五處并由內務部派醫前往分設局所檢查 田中玉  
一月十四日 江漢電

聞鼠瘟傳染已至太原境內祈將情形飭廳電諭特禱江漢關監督 吳仲賢叩

一月二十日 歸綏電

綏區辦理防疫按照條例應即次第斷絕交通所有設卡地方已於十二日一律佈置完備如東路之買當陶石氣保爾合少拐角堡東南路之殺虎口紅門口七八墩口西溝門北路之大灘大營子各方地均經派兵堵截請以兩星期為限無論軍商貨在未經開放以前一律停止往來應請通飭知照以免徒勞往返希電覆 蔡成勳

一月二十二日 歸綏電

號電敬悉疫厲傳染甚於水火敝處已於察晉通衢設局施行檢驗并實行斷絕交通曾經電達諒已邀鑒尊處於沿邊沿河遮斷交通至為企佩已佈告軍民人等一體遵照特覆 蔡成勳

二月十六日 察哈爾電

接車站吳警官電開頃由陽高站報告天鎮城關及距城北五十里之闌家屯有疫發現已斃數人事經多日尚無辦法天鎮距張垣僅百八十五里若不從速派醫會同軍警認真防堵勢將蔓延張垣理合據實稟聞等語查天鎮城關闌家屯等處既發疫症距張甚近希速派醫前往查驗酌辦并將通張道加隊斷絕禁止交通 田中玉

#### 第四項 督軍兼省長致外省電

一月十七日 致察哈爾田都統

綏屬五原疫症聞已傳及歸化頃據右玉縣電稱有客民自後套回道經該縣內有四人患頭痛吐血立時身故尚有二人病勢相同等語查該病狀與部派伍醫官所稱肺疫相同已令設局防禦大同陽高等縣近靠鐵路傳染最易亦應預防應如何在豐鎮設所檢查特奉商盼覆

一月十八日 致察哈爾田都統

銑電敬悉已電大同鎮道前往查驗併派軍警於通張要道斷絕交通

一月二十日 致察哈爾田都統

巧電諒達據大同鎮道報稱前聞闌家屯發現疫症已派團副趙仲璣率帶消防馬隊馳往天鎮督同知事及各駐軍依法辦理併將通張大道加派軍隊斷絕交通

一月二十二日 致歸綏蔡都統

晉電誦悉防疫要著首先斷絕交通既承尊處派兵堵截殺虎紅門各口無論軍民商貨一律阻止前往極深感佩敝處早已通令沿邊各縣一律堵截併隘口嚴行檢查云云

二月一日 致直隸曹督軍

准交通部電開據正太路丁局長電稱聞直隸平山縣境亦發現疫症查該縣與晉屬五台孟縣接界前因右玉等縣發生疫症恐口外歸客入境傳染已飭該兩縣將各口堵塞斷絕交通并令於入直各要隘嚴行堵截東下以昭慎密請飭令平山縣確查協力嚴防如能在五台孟縣交界各地方加派員警實力堵截則節節布置疫氛當不至東侵也

二月十五日 致河南趙督軍

寒電誦悉晉北各縣由口外歸客傳染發現疫症迭派軍警堵塞各口斷絕交通省城及東南各縣均無傳染潞澤一帶尤屬平靜并無疫症發生倘果南竄即行飛電奉聞

第五項 督軍兼省長令省外各機關文電

一月〇日

(通電)據報告此次綏遠特別區域所轄五原薩包一帶發生之瘟疫已由中央派員檢查確係肺疫與鼠疫同一毒菌而毒發更烈傳染最速此疫在前清宣統二年九十月間曾發生於東三省延至宣統三年三月初始告肅清蔓延五月死亡四萬餘人言之至為痛心事定後於宣統三年三月徵集中外各國名醫在奉天開萬國鼠疫研究會迭經詳細討論此種肺疫祇能嚴防傳染絕無方藥可治當東三省疫之初起吾國醫生亦有用清熱解毒藥劑治之者然祇能療治同時發生他項普通疫症如既染肺疫絕難療治迨死亡日多醫藥罔效乃羣相專注於防之一途而傳染之禍業已不可收拾可為前車之鑒此次口外疫起所有防疫各種方法業經前後飛電各該文武官長遵照茲再切實言之祇有嚴防傳染四字即嚴防與病人直接呼吸及病人所吐痰血內含毒菌之傳染也嚴防之法最要者為堵絕外來之疫撲滅內地之疫及截斷鄰村之疫而已堵絕外來之疫即遮斷交通嚴查由發生疫地歸來及沾染疫病之人與裝載染疫死體之柩禁止入境各防禦線文武官長及委員均任之撲滅內地之疫即病者實行隔離死者消毒速埋恐有諱匿嚴行搜查各縣知事駐軍長官及警佐均任之截斷鄰村之疫即一村有疫不准與他處交通並曉諭

人民以鄰村染疫斷絕往來即至親厚友亦必拒絕各地方官及村長副均任之頃已由中央寄到萬國鼠疫研究會議決條款特再印刷成冊並附發官吏防疫須知分寄多份仰各該文武官長詳細閱看其關於學理者姑置之其關於防法為吾力所能及者則竭力為之所最希望於各文武官長者亦祇此實行嚴防傳染並即發為防疫警告人民多張務於接到後分送城內紳商及各村長副切囑剴切曉諭人民俾共曉然於此次肺疫祇有防禦可期消滅之策斷無療治可期全愈之方吾民既不幸而遭疫而為保全多數生命即不得不專注於實行嚴防傳染此事關係民命甚鉅合亟檢發印冊特令知照萬勿輕忽致釀巨禍切切此令

案據防疫總局局長南桂馨呈稱查毒疫流行甚於猛獸瞬息千里勢已南侵迭經分令第一二線防疫區內各屬縣知事嚴厲設防迅速撲滅各在案特恐各縣知事辦理不善或奉行不力稍不經心即致蔓延似非嚴定考成不足以資遵守而策進行茲由局長擬定知事防疫考成條例六條是否有當理合呈請鑒核令發各縣知事遵照并送知事防疫考成條例一份等情到署除指令呈摺均悉察閱所擬知事防疫考成條例獎懲兼施應予照准除通令各縣外仰即遵照并分咨各機關摺存此令印發並分令外合將知事防疫考成條例另單刊印令發該縣仰即遵照仍將奉到日期申覆備查毋違此令

(條例載本編章制類)

一月一日

頃有外交團詢及晉省發現鼠疫五原尤甚等語希速查覆等因查五原並非晉省轄境請逕電蔡都統查

覆各該縣近日是否有鼠疫發生仰速查覆 電大同道尹及沿邊各縣知事

來電悉縣境無鼠疫發現至慰仰仍隨時詳查如有與鼠疫相近之病發生即行飛電具報同上

一月二日

准外交部來電院派醫官伍連德來晉查視疫症請飭各縣妥為照料等因已覆稱晉省轄境並無鼠疫發現惟伍醫官前往五原必經陽高大同等縣仰即轉令各知事妥為照料並於晤面時詳詢預防方法及與鼠疫相近之疫症通電各知事詳查預防仍具報查考 電大同道尹

一月五日

准外交內務交通部支電內開據伍連德醫官電稱歸化發生時疫似是一種肺疫傳染甚易並據外交團面稱該處與北京交通甚便祈中央政府嚴行防止以免蔓延等語現派伍醫官專司其事應請飭知該處文武各官一體認真協助並隨時與鐵路人員接洽等因仰即遵照 電大同鎮道

一月六日

據右玉陳知事報稱近有口外回省者數人道經該縣內有四人患頭痛吐血立即身故餘兩人亦患頭痛吐血甚重等語查此種病症與鼠疫相近已飭迅速隔離嚴加防禦各該縣倘有近似此種病症或另有疫症發現速即詳細具報俟將預防辦法訂妥另電飭遵 電大同道尹及沿邊各縣知事

一月七日

魚電悉應先由該知事督派人員在所屬沿邊各口檢查病人禁止入口以防傳染本署已妥籌防疫辦法

候令遵照 電右玉知事

該縣既有口外客民因疫病死應迅速深埋一面設立檢查所病人隔離所並將縣境各口酌量歸併只留一口將外來行旅留所檢查七日如無疫症然後放行已飭陸軍在入口地方協助彈壓並候派遣西醫前往襄辦同上

麻電悉右玉既已發現疫症已飭迅速設立隔離檢查等所並將沿邊各縣應行分區防制各口酌量歸併只留一口派遣軍隊協同將外來行旅留所檢驗七日如無疫症然後放行此外由各該縣設立分局檢驗經費先由地方款挪用除電右玉縣外大同陽高天鎮三縣即由該鎮守使專派陸軍西醫官迅速籌防并轉令遵照勿延 電大同鎮道

一月十一日

據報有忻縣商民某由口外回來行至該縣屬之後窰鋪染疫身死其騾戶行至阜家坪亦斃聞其靈柩已擬搬運回籍等語疫症傳染最易關係至為重要近在縣境發現該知事毫無覺察殊屬疏忽已極除將該故商靈柩禁止搬運外仰仍遵照前電將雁門一帶交通斷絕嚴密檢查毋得稍玩 電代縣知事

一月十二日

准陸軍部真電內開綏遠鼠疫發生聞已南侵(云云)等因查前已劃定沿邊各縣為第一防疫線迭經分電遵照仰即派員督察沿邊各縣及駐軍一律照防疫辦法嚴密辦理毋稍玩忽電大同鎮道朔縣馬旅長河山張團長

據報新岱岳有自口外歸者四人均已染疫身死仰即迅為深埋并檢驗遺物實行消毒民命所關勿稍疏忽電山陰知事

鼠疫漸已南侵亟應專派員警前往雁門關檢查如有口外搬回靈柩應嚴禁入關立刻深埋其由口外回家人民無論有無病症一律不准輕易入關仰即迅請本地士紳並督同警佐認真防範電代縣知事

口外鼠疫發生迭接國務院內務外交各部來電催促實行防疫業將防疫辦法分電各該縣遵照仰由該知事印刷多張廣為張貼傳知所屬境內各村長副明白曉諭設法消毒以免傳染事關民命務須認真辦理不得稍涉玩忽如有防範不力即查照中央防疫成案嚴予參辦省垣現已設立防疫總局一切詳細辦法應隨時電商該總局照辦電第二防線內各知事

據大同鎮守使電稱據右玉謝知事陳連長先後電稱有由口外回定襄四人內有杜姓一人因頭痛吐血身死當即深埋不准搬運靈柩進關殺虎口堵防甚嚴威魯寧魯等口已派警堵塞統歸駐馬一口易於檢查並於該口設稽查所派醫前往檢驗等情查所稱病狀當係時疫已電飭該知事等迅將該處各店戶於住客屋室用硫磺薰蒸並將死屍深埋後上用生石灰掩蓋並嚴令在殺虎口切實堵查等情查該使所稱深埋加灰及消毒各節均屬治疫要著至檢查行人禁止交通尤屬必不能已之事誠以疫易傳染故法防即以斷傳染為主手續寧嚴毋寬辦理宜速勿遲類如救焚拯溺萬勿稍忽電朔縣馬旅長第一二防線內各知事及所駐軍官

一月十三日

急右玉左雲大同平魯偏關河曲朔縣寧武代縣陽高天鎮懷仁應縣保德各知事頃奉

大總統電令內開疫症害人甚於兵禍(云云)勿稍玩延等因查此次防疫辦法業經分令並飭由防疫總局迭電遵照在案奉令前因合電遵照據張鎮守使電稱河曲及偏關之老營均為由五原包頭入晉之要道此次鼠疫發生所有鴻門老營河曲等均次第設立檢疫所應請電飭河曲偏關知事對於要隘嚴加防查等語查防疫辦法迭經電令該知事遵照仰即督同紳警嚴加防檢毋稍玩忽電河曲偏關知事

一月十四日

據報新岱岳店內住客染疫死三人應將該店房先行消毒所稱懷仁境內吳家客疫死之一人屍棺如何措置何以未據懷仁縣電報仰該鎮道飭查具覆懷山各縣既有染疫身死之過客應令各該縣迅速防範以杜傳染電大同鎮道山陰知事

頃准國務院元電內開疫氣已至大同希飭沿邊各縣地方官一體嚴防以重生命等因查防疫辦法迭經分令各縣遵辦在案應即迅飭實力辦理萬勿言之諄諄聽之藐藐切要電大同鎮道並令飛轉各縣知事

一月十五日

疫症傳染最速一經蔓延為害至烈仰各實力防範迅速從事已經傳染地方火速防檢未經傳染地方速辦消毒代縣知事曾寶豫已因防疫不力撤任聽候呈付懲戒各該員等務須一體慎遵勿稍玩忽電大同鎮道朔縣馬旅長晉北各團營連長雁門道屬知事警佐

准內務部咸電開現據何陳兩委員提議在康莊等處設所檢驗(云云)希飭屬協助等因仰即遵照轉飭

一體協助 電大同鎮道

疫症傳染甚速該團部暨現率官兵應暫駐原平茲委該團長爲第三防疫線檢查長仰即督飭所部會同地方官紳切實檢查以免傳染 電原平路團長

代縣境內據報已有傳染疫症身死者迭經本省長電令該知事會寶豫切實防範迄無隻字電覆軍官數次面商辦法亦置之不理實屬漠視民命著即撤任聽候呈付懲戒調署代縣知事張文翰未到任以前委該實察員曹聯鵬暫行代理仰即星夜赴任切實辦理防疫事務 電代縣知事曹實察員

一月十六日

據電話報稱代縣七里舖地方有自口外馱回染疫身死靈柩一具擱置六七日之久尙未掩埋仰即派員前往檢驗明白查照檢疫條例即刻擇地深埋並將隨帶衣物用石灰封固再查同行人伴及脚夫有無染疫情形一併派醫檢查留住如有病即行隔離經過七日以後確無病症再行放行 電代縣孫團長

鼠疫南侵亟應預防茲由本公署組織防疫隊在石嶺天門兩關駐紮實行檢查無論何人非七日以後確無疫症不能放行其兩關附近小道概行斷絕恐行旅商民未及周知冒昧南來屆時或勒令北回或檢查羈遲未免徒滋苦惱仰該知事等迅速布告各警佐亦設法廣爲傳知商民人等暫行中止南來倘行旅有萬不得已必須經此兩處者均應受防疫隊之檢查此本重多數之生命免劇烈之災禍其各仰體斯旨 電一二三防線內各知事

寒電悉各口遮斷交通辦法甚是應即切實進行總之防疫要著不外遮斷交通實行隔離預先消毒等法

仰即查照迭次電令辦理 電神池知事

據報忻縣東村人民某姓由口外染疫回來行至雁門關疫發身死聞此人曾受殺虎口檢查等語查鼠疫傳染本有潛伏七日之說七日以前似是無病一日疫發立即致死故檢查行旅必須留住七日已過潛伏期限確無病症方准給照放行此次在殺虎口檢驗必係未經留住七日一檢即放致至雁門關疫發身死之事倘稍有傳染該檢查員豈能當此重咎仰該知事迅即轉飭殺虎口人員實行留驗毋再輕縱 電右玉知事

現在防疫第一要著全在斷絕交通已飭省北各縣及忻縣知事設立檢驗隔離兩所凡係省北經雁門關南來之行旅均須在忻縣檢疫所留驗七日證明無病方准放行如遇病者送隔離所死者即深埋消毒此事全賴該隊長商明知事督警堵絕關口切實辦理倘有由省北染疫病人死屍及靈柩繞越忻境南下即爲該隊長是問 電忻縣王隊長

一月十七日

疫症宜嚴行防範自電到日起三日後凡有由石嶺關以北南來之行旅一律留驗七日無疫發給執照始准購票上車各該知事應擇扼要地方先行設立檢查所以便檢驗 電榆次壽陽平定知事  
瘟疫不在空氣由人與患者直接呼吸傳染故遮斷交通隔離病室均爲要事所請撥款一節准由地方或征存雜款項下動用俟規劃一辦法再行令遵 電晉嵐知事

一月十九日

口外疫症發生客民帶疫回晉有在左雲右玉身死者北路各縣業電令遮斷交通設所檢驗聞有由薩拉齊回晉之孝義介休等縣商民近皆由磧口回籍深恐帶有疫症傳染內地應由余知事迅在磧口設所檢驗包薩一帶回晉人民均扣留七日確無疫症然後放行並由李營長派軍協同彈壓介休孝義兩縣一併設所檢查注意防範毋稍疏忽 電磧口李營長離平介汾孝各知事

現在防疫事繁時常需用電話各該處向有商電嗣後電報均送商電局拍發毋送軍電局免致久佔線路 電大同鎮道忻代知事

巧電悉本署陽日即令該知事設立隔離所該知事並未實力籌辦乃復貿然請示尤屬異常荒謬應記大過一次縣境歧路既多警察如不敷用應准酌量添招總之防疫如救焚遇有應辦事宜立須切實籌辦何得藉請示為名預作諉卸地步如再玩忽定予撤參 電右玉知事

一月二十日

據晉北鎮道電稱現值防疫之際省北各口已一律封堵惟恐由茹峪胡峪大口小口等處繞越偷過請飭繁應兩縣防制等情仰將該兩縣所屬各口實行堵塞並遣派員警設立檢驗嚴密稽查 電繁時應縣知事 遮斷交通嚴重檢查為防疫第一要義行人或感不便勢屬無可如何仰將所屬七口實行堵截毋稍疏漏

電平魯知事

一月二十一日

皓電悉原平附近既未發現疫症務須按照前電檢查辦法嚴查外來染疫及疑似病人一律禁絕入境免

致傳染此疫迭經研究祇有防法絕無治法前發各方及郝醫士所擬藥方祇能療治他項瘟疫不能療治肺疫仍專注意防檢為要 電原平路團長

據報該縣巡檢司有由包頭運回染疫身死屍棺六具巧日尚未深埋此種疫屍傳染最速該知事毫無聞見應予申斥仰速查明已否掩埋迅覆 電河曲知事

防疫消酌應以石灰為主就地即可購辦石灰酸已派員赴津滬購買購到即行酌發 電大同鎮守使 一月二十二日

所陳辦法甚是疫症潛伏情形前電已詳一經發覺決無治法應將病者實行隔離雖親屬不准接近割愛一人全活無數故以嚴防為第一要義北來行旅務須認真檢查毋忽 電壽陽知事

此次疫病名曰肺疫又名黑死病傳染最速其傳染之理由有二(一)疫苗在空氣中不傳染全由病人所吐之氣及痰血便溺等物含有疫菌傳染於接近病人之人(二)初受傳染的人不覺有病此為潛伏期經過三日至七日方始發覺在此潛伏期內其所吐之氣及痰血便溺等物已含有毒菌亦能傳染接近之人茲防法有三(一)對於病者先用白布巾裹新乾棉花二寸厚一大片緊罩在病人口鼻上日換二次伺候病人者止可一人亦如上法緊罩口鼻日換數次換下立刻火化其所吐痰血及便溺應洒石灰剷埋地下其衣被應於太陽光下晒透(二)對於死人速將門房關閉過三四點鐘再開先用生石灰水遍洒於坑上地下仍將房門關住過四個月方可居住凡抬埋疫死之人須照上法以白布棉花緊罩口鼻埋畢用火燒之并以開水洗手(三)對於未病而曾經與病人接近之人不論其已否傳疫一律禁止與病人交通凡有

疫之家別家與之隔絕有疫之村別村與之隔絕總之疫無治法惟有防治之雖難防之極易但能不與染病之人見面即可不受傳染故防疫要旨惟有生者遮斷交通病者隔離死者速埋消毒耳在人民扭於習俗醫藥治療情所當然而官廳防疫如寇只當力謀撲滅此乃保全生命之策雖人民稍有不便得難顧慮若防制不嚴一經蔓延縱疫殺人各將奚辭仰各查照上開各節切實遵行毋忽 電全省文武官長

一月二十三日

搜疫爲防疫要義惟搜疫員警須知預防並加消毒否則搜疫之人即能傳疫又搜疫巡警對於人民宜平和勿暴躁仰飭所屬妥慎辦理 電大同鎮守使

一月二十四日

該縣疫氛日熾黃花嶺等處既爲要口早應設防嚴堵乃疫死既多始行派警檢查實屬玩忽仰速遵照本署養電嚴行辦理東辛莊既爲應山合治著速轉應縣協力防堵 電山陰知事

接綏遠總商會電稱天吉公攬送銀兩關係字號年賬及商人度歲之用請交通入口當經電覆現值防疫期內遮斷交通事關通令碍難變通該商等稍緩就道更爲要全且逢此災變於字號信用尤無妨害希即轉達等語合電知照 電大同鎮道

董村爲該縣第一大村與孫村相距祇二里現在孫村既發現瘟疫應速將該兩村間之交通斷絕電忻縣知事警佐

一月二十五日

本署已派宣講員攜帶公文前往該縣辦理宣講防疫方法俾人民均有普通防疫智識應由該知事先分路選定防疫宣講員二十人以至六十人俟該宣講員到時即先講明防疫辦法以便分赴各村宣講 電一

二防線內知事

茲決定各縣消滅染疫村鎮辦法如下(一)已染疫之村應先派警將此村四面與鄰村往來之路均截斷戒令不准與染疫之村往來(二)應派警到染疫村內檢查其已染疫身死者除將屍柩速埋消毒外即將病人居室先閉數時再遍洒石灰濃汁如係全家染疫身死者即將房屋用石灰消毒後嚴加封鎖不准他人偷入(三)其村內現染疫病之人即令獨居隔離既係染疫之家無論其家現染病狀如何均勒令與鄰家斷絕往來并戒令附近鄰家不准到染疫人家看視(四)其村內之未染疫人均戒令嚴閉家門不准有染疫家之人入門(五)該村如有一處數家染疫即劃爲有疫區其一方多家均未染疫即劃爲無疫區務須嚴禁無疫區內人與有疫區內人往來譚話(六)此染疫之家及染疫之村俟經過七八日再無染疫之人即令自由往來(七)派警到染疫村內須組織臨時掩埋人夫載運石灰以備速埋疫死之人(八)警察及掩埋人夫到有疫人家均先用白布條罩護口鼻周圍不可露縫繫於腦後內襯新乾棉花一二寸厚用過一次即更換以火燒之出去後宜用沸水肥皂多洗而手皮膚(九)派警到染疫村內時務須明白勸諭說明必須如此辦理純爲保全大家未染疫病多人之命(十)該縣如已有傳染疫病之處已否消毒即查明遵辦隨時具報 電大同鎮道憲武馬旅長代縣孫團長暨大寧代縣陰雲玉朔懷渾應神五平各知事

馬邑各口堵塞不准行人入境辦理甚是左雲岱岳疫氛益烈應督飭馬邑縣佐警佐於各縣接界之處派



警從速堵塞并遵照養電防法各條諭令人民切實預防 電朔縣知事

一月二十五日

陽和坡李生元等疫死經醫考驗確係肺疫該村交通既已斷絕應遵照本署養電防法各條嚴切辦理 電

大同鎮道知事

一月二十七日

沁電悉水磨疇村既已疫死全家十二人馬姓之媳另居隔離應禁止他人偷入馬姓房院及到馬姓媳婦住所并迅照養徑兩電切實辦理毋任蔓延干咎 電渾源知事

神山堡及瓦窰寬灘等村疫死至十九人之多發現在一月中旬何以遲遲不報任聽蔓延茲復以西區窰遠請撥軍隊等情該知事責任所在并不實力防制乃竟以地方窰遠希圖卸責實屬玩視民命迅即遵照徑電消滅村鎮染疫辦法限期將神山堡各村之疫完全撲滅如再延誤嚴參不貸并將疫死人數據實查報 電崞縣知事

一月二十八日

原平鎮早已嚴加防堵李世方李世榮等何以得此疫症係由何處染來應速查覆 同上

據報境內并未發生疫症已悉該縣濱臨黃河與陝西府谷隔河接壤邊牆各口均已派軍嚴塞深恐口外客民繞越偷入應督飭警兵將入境各口嚴切斷絕并遵照印發防疫須知警告各件廣為傳布使各預為自防切勿以現未發生稍涉疎忽 電保德知事

沁電悉該縣既臨河岸復與榆林神木接界務須嚴密防堵毋令一人繞越到境并將所發防染要言警告等件遍諭人民使知自衛為要 電興縣知事

凡郵寄各項防疫文告純為喚醒官吏防疫決心輸入人民防疫知識起見關係極重非尋常文告可比各該知事縣佐警佐等務須於接到時速發各機關村鎮分散張貼曉諭人民俾使週知并將散發地點函報備案本署仍派密查如有不實不速定行嚴辦 電一二防線內知事縣佐警佐

同成車站房屋住有管卷之張委員即由該知事就近函商借用由該委員轉達以省周折穆醫官既已到縣迅即會商趕辦督同檢查員認真檢查該縣為火車通衢尤應與該路各站長妥為接洽 電榆次知事

一月二十九日

據報右玉疫斃四十餘人該知事尙不及知除已記過外仰該鎮道代選得力人員四員授以防疫智識委赴左雲右玉渾源應縣幫同各知事辦理務期迅速撲滅併轉飭遵照 電大同鎮道

一月二十九日

秦二虎既已疫死深埋應先將死者家屬實行隔離發去徑電一分仰即遵照內開十條切實辦理迅滅疫氛 電偏關知事

該縣已疫死四十餘人何以未據續報姑從寬記過一次以觀後效仰即遵照養徑電嚴行撲滅 電右玉知事

一月三十一日

井坪疫勢蔓延仰速電朔縣速將本署警告人民須知分送各村使人人篤信遵行為要 電寧武馬旅長

一月三十一日

勸電悉直省災民入境與防疫頗有關係已分電東北沿邊各縣認真取締該縣災民既多尤應切實檢查

電濕縣知事

據報府谷有由包頭回家之民疫死情事查府谷既已發生疫症應將該縣與府谷交通之處實行斷絕并由該營長等嚴密防範 電保德知事及武營長

一月三十一日

本署印發防疫諭單仰於接到後傳諭各村長副明白曉諭按村發給即囑照此諭單勸告村民務使深信單內所開各條為防疫要著至村人是否明白防疫辦法與村長副能否照單曉諭人民及各村有無實貼所發諭單均以該知事等是否盡心曉諭為斷仰切實辦理毋忽 通電各縣知事

二月一日

准交通部電開平山縣白蓮村有疫將獲鹿井陘兩路暫不售票請迅飭東路各縣查明如有延及速分別堵截隔離等因合電該縣迅速注意嚴防 電平孟壽普各縣知事

勸電悉疫無治法重在嚴防本署印發防疫須知警告等件應悉心研究明白勸諭總使人人咸知自防為要嗚代忻定均已染疫與該縣交界地方尤應從嚴堵塞斷絕交通 電五台知事

警佐沈壽颺有溺職守已飭警務處撤差懲戒 電大同鎮道

據調查報告該縣東關及賈寨黃尾子剪子舖等處瘟疫甚烈剪子舖死八九人即棄屍野外黃尾子死一

人亦四五日無人掩埋等語此事關係多數生命該知事何竟毫不過問以致傳染日烈實屬玩視民命著

先記大過二次仰即派警迅將疫屍消毒深埋毋再疏忽致干嚴辦 電應縣知事

二月二日

三十一電悉得勝口商旅糜集至為可慮業已規定辦法於三十一電發速查照原電飭張連長高營附分別辦理 電大同鎮道

三十一呈報已悉邊牆水門等口應從嚴堵塞滑石一口切實檢查口外歸客不得繞越入境為要電偏關知事

二月三日

該縣距省最近西山風峪口一帶飭警嚴防無令西北歸客繞越潛入并將印發防疫須知警告及通行徑電各件廣布周知 電太原知事警佐

據呈設防情形已悉分局既已成立應督飭各員認真辦理添募警兵八十名應分布接壤忻定各處嚴密防堵偏僻小路尤須注意 電陽曲知事

據復奉到考成條例併設所檢查情形已悉前據報告該縣人民在口外經商者衆深恐繞由磧口回縣業經分電磧口駐有軍隊防堵在案該縣應照前電飭警認真檢查 電介休知事

據送疫斃人數表兩日疫死二十四人深堪憫惻迅照養徑兩電嚴切辦理尅期撲滅以全民命 電左雲知事  
據趙參謀萬醫士電有商人死於原平附近南賈村運回五台確係肺疫運死者之人及附近鄰右有無傳

染應商同西醫逐往檢查實行隔離 電原平路團長

二月四日

冬電悉撲滅之法首在使人民知而畏避次則責成村長副斷絕各家之交通凡有外來者一律阻止入村該知事迅在此處用力焉 電山陰知事

防疫吃緊溫委員可暫緩返省所請電令放行之處碍難照准 電崞嵐知事

此次疫症傳染以客店爲最多應先派警逐店檢查酌量封閉並將某處客店因住客傳染店戶身死等事明白宣諭嚴禁留住由有疫地方經過行旅至岩頭大保店內既疫死過客四人迅即遵照養徑兩電切實辦理勿任蔓延 電繁峙知事

染毒衣物以消毒爲要仰速廣散警告人民書及實行村長副諭單辦法 電代縣知事

二月五日

獅子峯嶺既已斷絕交通應即切實堵截治疫以嚴防爲第一義硫磺石灰即消毒要品仰即查照養徑兩電暨防疫須知辦理 電五台知事

疫症傳染以店戶爲最多應先派警檢查各店酌量封閉並將五家村店戶因留過客暨染疫身死情形宣諭各店禁止留住由有疫地方經過旅客該縣疫症初起急應遵照養徑兩電辦理以絕傳染 電靈邱知事  
該縣非實施之區未便援照右玉成案磧口柳林軍渡高家塔等處抽派巡警堵塞以防繞越經費即由原有警欸或由地方欸移緩救急可也 電離石知事

二月七日

防疫現在各縣一切佈置業已就緒所有雁門關以南有疫地方本督軍預定於二十日以內一律撲滅淨盡民命所關考成所係各該員等迅即一體振刷精神切實辦理如期竣事本督軍有厚望焉 電代縣孫檢查  
長原平路團長及忻代嶂繁台定知事警佐防疫委員

據調查員報各該縣城內三義店主曹金五日得病當晚身死其弟曹老老亦得病本城王俊秀當街倒斃等語該縣既有疫症發現仰即查明傳染來源迅速堵絕外疫傳入撲滅內疫蔓延  
文電悉肺疫無關空氣自非雨雪所能消滅仰仍盡力防範毋懈 電忻縣知事警佐  
據馬旅長報告該縣屬麻黃頭村自一月十八日起念一日止確已死亡十六人該縣前報遺漏尙多仰速查明疫死者人數日期據實呈報毋稍含糊 電朔縣知事  
神池朔縣境內均已發現疫症應即就近督飭迅速撲滅仍先督同軍醫對於所部軍隊嚴加防範毋令稍有傳染 電寧武馬旅長

該縣疫氛稍減甚慰仰即切實辦理雁門以內預定二十日內撲滅淨盡該知事考成所係務須勉力從事  
電崞縣知事

二月九日

聞直隸順德府舊屬發現疫症該縣均與接壤一旦竄入晉疆爲患匪淺應即相度地勢扼要設立防疫局所嚴重檢查以杜傳染倘因預防不力使疫氛波及轄境定爲該知事是問 電平昔遼和潞黎各知事

二月十一日

據報廣靈縣西與渾源交界之井窰村劉姓一家疫死十人等語此次疫症發生早經迭飭斷絕交通該知事等未能實行防堵任令疫症延及井窰村實屬玩視民命仰迅遵照養徑兩電並將所發警告特諭切囑村長副一體實行毋任蔓延干咎 電渾源廣靈知事

據報告該縣東北二關及各村庄已疫死九十名城牆外有棺材二口櫃子二頂內放死屍並未掩埋經消毒馬隊查報始行掩埋等語該縣疫氣甚熾死屍傳染最烈該知事警佐何以毫無察覺實屬玩視民命迅即遵照養徑電並將警告特諭切囑村長副及人民一體實行迅期撲滅毋再疎忽干咎 電應縣知事警佐

二月十四日

防疫之法全在各村長副協力襄助如能遵照特諭各條切實奉行疫氣自不難撲滅仰即嚴行督飭可也 電靈邱知事

現因防疫吃緊業經郵發六言布告曉諭人民各知事於收到後速行分散各村鎮責成村長副及首事人等切實與人民講解明白以期由信生畏各知自防以補官力之不及仍將分散地方報查 電雁門道屬各知事 暨奇與嵐臨榆壽平昔孟離陽和遼孝介汾各知事

二月十五日

前據電稱在鎮門邊口設遞接所接遞糧粟茲據大同鎮道電稱疫毒東漸豐鎮屬之張皋鎮一帶運糧傳染堪虞請飭將前設遞接所緩辦等語所見極是應速遵辦不得顧念商旅一時之困致危多數生命 電陽

高知事

調查員蒸文兩電均悉該縣毗連之河曲岢嵐均已發現疫症各口應一併認真堵塞并將特諭所開各節實力奉行使人民咸知信畏自易防檢 電保德知事

二月十六日

據右玉陳知事十五日電稱該縣境內十日以來無疫發現是否屬實仰即就近派員確查電覆 電大同鎮道 二月十七日

據調查報各該縣已疫死一百四十五名義井仁義兩村即疫死七十餘名現時義井仁義附近各處尙不禁止演戲並聞該知事言染疫而死想係天命我亦無法等語殊屬頑謬之至疫症全恃人力撲滅若竟諉之天命是不啻以不忍之心行殺人之事言之至堪深痛該知事於染疫人民並未切實檢查於染疫極烈之處尙不禁止演戲以絕傳染豈得謂非膜視民命仰將一切文電印件熟讀一遍立即翻悟並對諭人民一體實行迅期消滅毋任蔓延干咎 電神池知事

二月十八日

據報該縣東區之董村警察分所私放商旅通過本署派員李海清在石槽卡曾見有北來脚夫持有該分所圖記等情仰速查禁並切究該分所有無通賄之弊 電忻縣警佐

據調查報告一月三十日該縣王喜疫死其父母妻子均被該知事派警趕入城東白旗廟二月四日范海疫死亦立將其父母趕入廟內當時廟內門窗炕灶全行坍塌水火食物一概缺如等語此次防疫係以不

忍人之心行不忍人之政嚴防之法不能救一人之疫死正所以救其餘衆人之不疫死隔離所不能救人  
之不死於疫必能先救人於死凍餓國家愛民之政即厲於厲行防疫之內該知事將王范疫死家屬送  
入廟內隔離未始非嚴防之意惟事前並未在廟內籌備供給是使人之死於疫者兼死於凍餓實與國家  
防疫愛民之政相反亦與該知事防疫救民之意相背殊屬荒謬已極著即嚴令申斥仰仍以愛民之心救  
民認真防疫積極進行毋再稍有疎忽致干嚴懲 電右玉知事

此次各縣疫死人民已有千餘名之多均係由病者傳染而致無一人憑空得者亦無一人治愈者可見此  
種疫症應盡力防其傳染証以奉天金復海蓋之防疫周密在東三省疫症無縣不有而該四屬毫無發現  
及此次代縣右玉山陰忻縣崞縣定襄五台等縣之認真辦理或即時撲滅或日漸減少確無疑義深望各  
該知事及員警士紳人等勿固執舊知勿懶惰委靡致誤民命至囑電雁門道屬各縣印委醫官離榆平孟壽昔各知事

二月十九日

十字摩天各嶺既爲晉直接界之要隘應准添警堵塞百岸嶺派員檢查一併認真辦理月費應先由地方  
欸內移緩就急如實不敷再酌提雜欸補助支用分報查核 電遼縣知事

二月二十七日

此次防疫得法責成村長副分任防堵成效已著以定襄縣爲最五台縣疫氣未至大起亦尙可取山陰左  
雲兩縣知事防疫頗爲出力應由該鎮道督飭早日撲滅再行照章核獎天鎮沈知事防疫玩忽以致釀成  
人民聚衆抵抗已另電撤任聽候呈付懲戒委實察員余掄元署理右玉陳知事對於防疫方法似尙明白

惟空文多而實際少昨日已嚴電申斥督令切實力行仍由該鎮道就近察看隨時報核 電大同鎮道

據應縣報稱自十六日至二十六日無疫死之人亦無發現病者與該鎮道有電所呈亦無大異除電飭仍  
嚴防範外應再就近飭委確查報核 電大同鎮道

該縣自水泉堡等村疫死二十三人後業逾十日無疫發現並據趙參謀報稱該知事防疫認真協助各員  
亦熱心從事均堪嘉獎仰仍嚴密防堵邊境勿令行人踰越 電偏關知事

電悉該縣發現疫症能如期撲滅具見熱心任事深堪嘉慰先著記大功一次如果從此再不發生事竣再  
行核獎仰仍督飭嚴防毋墮前功 電五台定襄代縣知事

陽日電令限二十日以內盡力撲滅疫氣限期已屆該縣仍未肅清雖由前知事貽誤所致該知事應極力  
補救著再展限十日加緊撲滅如再延忽嚴懲不貸 電繁峙知事

該縣前此疫氣甚熾陽日電令限二十日以內盡力撲滅限期已滿據報從前有疫之村多日未發惟隔離  
所尙不免疫斃者仰仍竭力趕辦以竟全功 電忻縣知事

二十日內撲滅限期已滿該縣有疫之村雖經多日未發而下申南坡磨兒腦三村尙有新染者總由防範  
不力所致宣講員雇人替代自應看管示懲亦由該知事遴選不慎之故五台定襄代縣均已如期撲滅仰  
速切實辦理尅期肅清 電蔚縣知事

三月二日

山陰應縣偏關朔縣左雲右玉陽高靈邱廣靈九縣疫氣撲滅大同亦漸輕減深爲欣慰惟各縣所報是否

確實仍仰派員詳查具報以憑分別核獎其餘各縣務按二十日期限責令一律撲滅 電大同鎮道

三月四日

據左雲印委電稱該縣有疫各村實已消滅惟豐鎮與該縣北鄉僅一牆之隔豐鎮疫勢如何應由該鎮道派員確查是否消滅并幫辦善後事宜免再傳染 電大同鎮道

三月七日

委員樊汝鄰辦事勤勞因公病故殊深悼惜裝殮浮屠辦理尙屬周妥應候彙案從優請卹該故員籍隸河津其家屬已電該縣知事轉知并加撫慰歌電所稱前被看守之李巡官既據村民公懇准予保釋電忻縣知事

三月八日

廣電悉仰將分水嶺及泉則溝村與該鄰村無疫地方人民斷絕往來並先查明歇至沁縣交口鎮之病客已否疫死及脚夫張學兒死在何處迅復 電武鄉知事

三月十日

據報武鄉縣屬分水嶺之程姓店內有祁縣白獅嶺脚夫張學兒路經該店將所食之膳飯半碗給店主女孩食後不久即死並將其兩叔父一叔母暨女孩之父先後傳染身死辦理喪事之陰陽生及照料病者之該店主一族人一併疫死並聞該村附近死者約有二十人又有一村疫死者甚多先是一旅客於陰歷臘月二十三四日由省北到來遠鎮僱覓張學兒驢脚前往沁縣行至距沁縣北三十五里之交口鎮發現

疫症不能進行張學兒即行卸載仍往沁縣購米於二十七日回抵白獅嶺正月初一日發現病症初二日即吐血身死後二三日伊妻亦死初七初八兩日該村又死不知姓之一銀三銀兩人等語查核此疫始由旅客傳染脚戶繼由脚夫傳染其妻及程姓店主女孩遂至遞相傳播確有綫索可尋可見疫症非傳不染尤可見在潛伏期內亦能傳染武鄉縣陳知事曾翰接報後不能迅速查檢遮斷交通迨經本省長電令澈查延不具覆實屬玩視民命昨已撤任示懲頃接來電仍無切實辦理應候呈付懲戒在新任傳知事未到任以前仍應振作精神迅速圖功如再因循定即拿解來省嚴予懲辦各該縣或地處通衢或與武鄉壤地相接均應查照本署迭次印刷文件一體嚴防並在城內分班傳集各村長副將本署所頒特諭逐條諭令切實奉行如果漫不經心一經查覺定予嚴懲至該不知姓名旅客既在交口鎮不能進行應由沁縣知事遵照前電查明下落飛速電復該旅客既係由省北南行究係何處疏於防檢候澈底查懲示儆 電徐太祁沁襄源武長屯長遼社各知事

三月十一日

現在關內疫症均已次第肅清關外各縣撲滅者亦屬不少惟恐留有餘毒復燃堪虞本督軍爲重視民命起見特請西醫多員前往關外各縣視察如遇有疫之處即行協同防疫以清餘毒凡我人民應知西醫此來純爲救護人民生命自當表示歡迎不可妄相疑猜仰該知事即照此電印發多張剴切曉諭人民知照並候西醫到境時派警保護毋任愚民藉端造謠滋事干咎 電大同鎮道暨關外各縣知事

三月十二日

據報該縣發現疫症者已有四村勘虞兩電謹詳分水嶺南峪泉則溝三處磨爾鎮未據查報聞該四處已死二十餘人兩次僅報十七人屍體未掩埋者十餘具該知事并未確實考察僅責成委員辦理實屬玩視民命仰遵蒸電振作精神迅速圖功將屍體查明深埋病者實行隔離各村交通從嚴斷絕分水嶺初次死者之衣服由一乞丐脫去并追問該村將乞丐覓回依法隔離以防傳染 電武鄉知事

近據查報關內代嶠寧武各縣疫氣均已肅清該旅團長總司檢查分任撲滅實屬成效昭著旅長馬開松團長孫秉彝路福保均著先記大功一次所有旅團屬防疫出力人員即由該旅團長查明具報以憑事竣彙案給獎 電寧武馬旅長代縣孫團長原平路團長

三月十六日

現屆春融農氏均須盡力田畝關內各縣疫氣業已肅清關外各縣亦可依限撲滅在事官吏員醫應於防疫之中力求民便仰各就地妥籌辦法以重農事要在自身不避繁難慎勿希圖省事致人民重受苦困切切 電大同鎮道暨省北各縣知事縣佐警佐

陽日電令雁門關南有疫各縣限二十日內盡力撲滅以爲依次肅清關外疫氣之計現在定襄代縣五台均已撲滅忻縣舊染各村均多日未發僅隔離所內有數人未愈崞縣亦僅下申等村尙有少數患者繁峙未滅由前任知事敷衍貽誤已撤任懲辦責令曹知事尅日撲滅關北廣靈應縣偏關等縣亦均報多日未發具見熱心辦理者自能收撲滅之效除關內繁峙一處另電展限辦理并將定襄代縣五台等縣知事先行記功候事竣彙案請獎外雁門關外各縣有疫地方暨關內之崞嵐等縣統限二十日以內一律撲滅

淨盡并由該鎮道旅長督飭趕辦如期竣事 電大同鎮道寧武馬旅長關外有疫各縣暨崞嵐知事

### 第六項

督軍兼省長 防疫總局長 令省外各機關人員電

一月二十日

電悉沿邊沿河斷絕交通已據鎮道效電轉達歸綏飭令商民暫勿入口清水河既有傳染應協同鎮川檢查所切實堵截勿稍疏忽 電平魯知事

一月二十二日

電悉曹視學趙委員均應送石嶺關留驗七日無恙始准放行嗣後凡由北來遠境者須一律照章留驗毋稍徇縱 電忻縣知事

一月二十四日

據報馬七羅等疫斃速照養電防法第三條實行隔離諭令人民切不可與有病人家往來力杜傳染侍候病人者照防法第一二兩條辦理疫症無治法總以隔離嚴防爲要疫死人數隨時查報五日彙總列表呈送 電左雲知事

一月二十五日

養電所陳辦法頗見周妥境內現未發見疫症尤應斷絕交通遵照養日通電曉諭人民力爲自防并商同馬旅長協辦堵截以杜傳染局費應由地方欸內酌撥應用免致惜費誤事 電寧武知事

一月二十六日

據調查員報告該縣城內有一家八口染疫身死何以未據該縣電報如檢查確係疫死速將屍柩深埋房屋內石灰消毒嚴加封鎖派警在門外守護不准再有人私自入門以免傳出疫毒仰迅查覆毋延干咎電

渾源知事

據報本城人民邢吉升等疫死城內人烟稠密至為可慮據鎮道電稱已將城門議定封閉其未染疫之家迅照養電防法與病人杜絕往來切勿輕忽電大同知事

一月二十九日

朔縣神池崞縣均與該縣毗鄰而崞縣之五寨村僅距該縣城二十里尤為近在咫尺亟應斷絕交通以杜傳染仰即商承馬旅長認真辦理電寧武知事

一月三十一日

防疫留驗行人前經規定每人日給養膳費大洋一角四分業於省日通令在案茲再決定辦法如下(一)凡由口外南來或由有疫之地來者一律留驗七日無病者給予執照即令折回原來地點不准南來執照中并應註明經過地暨折回地點(一)留驗之人一律日給養膳洋一角四分務須實惠均沾不得稍有剋扣(二)期滿驗明確係無病不得故意留難(三)留驗留養隔離等所內執事人員均應妥為備設不得有凍餓暨虐待情形(四)所定養膳費并非按名給領自備火食應由經理人員就其應得之欸妥為置備供給如有自備資斧者聽其自便(五)凡窮民人等業經留驗期滿放令折回原來地點故裝行商重來希圖養膳者應即嚴行拒絕以上各條仰即切實遵辦應於嚴防災沴之中仍寓保衛行旅之旨民命所寄慎勿

玩忽 通電各縣知事

二月三日

東冬兩電悉疫死立即深埋不啻三令五申桃園疫死五台客民公然運送河邊不加阻止倘有傳染誰任其咎運屍五人仍應隔離監視神山堡疫勢未滅政化村又有傳染應即速斷交通尅期撲滅切切電崞縣知事

二月四日

胡柴溝發見疫死即應由所派警隊依法掩埋何得往復延擱嗣後務須不分畛域共圖撲滅毋再互諉干咎電平魯知事

二月十一日

該縣既發現疫症無論由何處傳染均應實行斷絕交通須知警告要言前已郵寄多份著即廣為傳布并責成村長副將頒發特諭實力奉行電五寨知事

二月十七日

近日各區未發生疫症頗有轉機如能於一星期外無他變相方可謂已經撲滅然後盡力防堵外來傳染可也仰仍竭力辦理毋懈電崞縣知事

如果代屬境內疫氛日漸寧息靜樂尙未發生該員既有新得之經驗應准回縣協助知事實力預防仍隨時具報查考電駐代武委員



二月十八日

前據軫電已令責成村長副實行特諭毋任陽奉陰違致滋延蔓迭據報告該縣疫染村已有十六處之多病者並不實行隔離死者亦不即時掩埋對於斷絕交通尤多疎忽無怪疫氣有加無已似此玩視民命殊堪痛恨應行申斥仰即振作精神力圖補救如再玩忽嚴懲不貸 電朔縣知事

二月二十七日

電悉各村十日無疫死之人如果屬實即算撲滅熱心任事深堪嘉慰仰仍實力防範毋墮前功電應縣知事  
委員贊佐

電悉自疫症發生以來該縣並無一人染疫足徵防範周密惟該縣四而均與有疫地相接仍應嚴防邊界勿令行人踰越 電靜樂知事

二月二十八日

人民果能均知隔離疫氣應早撲滅現在既未肅清仍當竭力進行小學教員如難兼顧宜講應酌派勸學員紳分投檢查是否實行隔離有無隱匿等情庶於防疫學務兩無妨碍有疫之村應暫緩開學電渾源知事  
會電均悉縣境疫氣未滅代管蒙古地方現又發生應實行隔離斷絕交通警告諭單及六言告示已各發百張付郵快寄仰即協力辦理 電河曲張團長暨知事委員

三月一日

該縣十日以來無疫發生甚慰惟稱高山疇村崔姓四子尚帶疫病仰飭警嚴密監視勿任再有傳染 電山

陰知事

三月二日

該縣為後發之區應早撲滅前次繁峙神池辦理敷衍致滋蔓延可為殷鑑仰速極力進行尅期竣事除現在有疫之村外不得再有傳染 電崞嵐知事

三月五日

查關北各縣疫氣肅清業分電各縣一律開放交通在案茲復接縣分段酌派西醫大夫留駐各縣督同員紳下鄉清查廓清毒菌茲派范福林大夫清查大同陽高天鎮派孫錫成大夫清查渾源廣靈靈邱派王榮先大夫清查懷仁山陰應縣派劉億德大夫清查右玉左雲平魯朔縣除分電外望即查照 電大同鎮道

三月十二日

封閉疫室不得輕啟原慮疫苗未死遽爾啟封傳染堪虞乃近聞各該縣每有疫死家屬因饑寒所迫有私行啟封情事殊屬危險特再電仰各該縣知事速行傳諭村長副轉告人民曉以利害並查明疫死家屬之實係貧窮者責成同族或公家量予接濟啟封後償還萬勿任其輕啟致墮前功切切 電有疫縣各知事

第七項 防疫總局長 令 致 省外各機關人員文電

一月十一日

(通令)查月前口外包薩等處有肺百斯脫當時僅據報紙傳述未知虛實近迭據右玉左雲大同等縣連日電告從口外回南行旅路經各該縣屬在旅店頭痛發熱吐血身死者甚多確係肺百斯脫疫症等情查

此症初染頭痛發熱咳嗽輕者三五日重者不過二十四小時即吐血而死因死後滿身發黑或黑紫色故名黑死症外國名爲百斯脫其流傳性最速得即不治亟宜設法防堵以重生命本月十日奉省令省垣設立防疫總局總管全省防疫事宜各縣分線辦理右玉左雲爲實施防禦地陽高天鎮大同平魯朔縣偏關河曲爲第一防線懷仁山陰應縣渾源廣靈甯武神池五寨代縣保德繁峙靈邱岢嵐崞縣忻縣爲第二防線均經分別電令遵辦在案餘縣均爲普通預防地機關軍隊均自行清潔預防學校如有疫症發生即行停課其疫現縣分停止訴訟傳案茲并印發檢查所簡章檢查隊消毒隊病院各章程仰即切實進行如有疫症發生即時電報本局

一月二十一日

(通令)查自惡疫侵入晉疆浹辰之中據報疫斃男女幼者幾及百人察閱來電對於疫死之人或有姓名而無住所或有住所而無姓名併有僅稱某日疫死幾人者甚非所以慎重民命之道茲特製定報告疫死人數總表式仰速照式印刷詳細填列十日一報其未奉此項表式以前疫死者亦應按日補填以昭核實附逐日疫死人姓名籍貫表式暨旬日疫死人數總表式各一紙

一月十日

疫症傳染最烈預防以遮斷交通爲最要嗣後凡有口外入境旅客務令居留六七日驗明確無疑似疫狀方准放行如能阻止入境尤妙 電左雲縣知事

口外疫症發生傳染最烈現經省署議決省垣設立防疫總局右玉爲實施防禦線朔縣平魯等處爲第一

防線除分令外請督令各縣速立防疫分局組織檢查所由知事督佐邀集紳商協助辦理併請貴部就近遴派醫官幫辦各縣防疫事宜 致朔縣馬旅長

疫症發生亟宜設法防禦以重生命現經省署議決省垣設立防疫總局大同天鎮陽高偏關河曲等縣爲第一防線除分令外請督令各縣速立防疫分局組織檢查所由知事督佐邀集紳商協助辦理上列各縣請貴署就近遴派醫官幫辦防疫事宜 致大同鎮守使

一月十一日

疫症發生亟宜設法防止省垣防疫總局業已成立其第一線實施防疫各縣仰即日組織防疫分局設立檢查所邀集紳商各界協助辦理知事即兼充分局局長警佐兼任檢查事宜凡行旅往來務令居留七日每日派醫檢驗證明確無疑似疫狀方准放行其由口外運樞南來者一律遮禁如有染疫死亡者須由檢疫所派人監視用石灰水浸洒尸體併須預先指定空曠葬地葬穴深七尺餘用生石灰填洒即日掩埋併標明死者姓名於葬地以資識別其第二預防線仰趕速籌備消毒事宜用生石灰硫磺爲消毒要品須多購備所有住屋即一切不潔器物均用硫磺薰蒸街市用石灰水潑洒併嚴重檢查北來行旅倘有疫症發現即隨時設立檢疫隔離等所飛電報告事關生命切勿大意 電第二防線內各縣知事

一月十三日

刻委武澤霖爲該處防疫委員一俟該委到日仰即協力辦理廂門關沿長城各口爲口外入關要路務須特別注意嚴斷交通 電代縣知事

刻委蘇夙敏爲甯武神池防疫委員業經出發一俟到日仰卽會同認真辦理陽方口爲往來孔道宜特別注意嚴斷交通 電甯武神池知事

葉大夫偕魏牧師定明日前赴該縣會同僑居該縣司徒牧師幫辦防疫仰優予接待會商辦理併轉司徒牧師知照 電代縣知事

一月十四日

據崞縣知事報稱該縣檢疫巡警於十二日見有駝背包裹一個形迹可疑展視發現屍身一具據屍親李先仲言忻縣人死者爲伊胞兄在口外傳染疫症行至左雲吳家窰身死等語業遵檢查條例掘坑深埋等情查左雲爲第一防線該知事應如何實施防遏乃既令染疫之人入境身死復縱其包裹出境使非崞縣警士查得則染及內地該知事豈能辭咎應加申斥吳家窰爲口外往來要道應速設檢查所實施防範倘再疏忽定卽嚴懲 電左雲知事

據山陰縣報稱查有定襄縣民同行五人驟夫一人由口外歸家至右玉縣死一人懷仁縣死二人餘三人於九日晚到新岱岳店十日均死病皆頭痛吐血等語查嚴斷交通凡遇過往人民均須居留七日無病然後放行迭經電令在案該知事等毫不實力奉行任令口外歸人越境死亡殊堪痛恨事關全省民命如再查有疏忽情事定予嚴重處分 電右玉懷仁知事

據偏關知事電稱該處現會商駐縣軍隊將邊牆一帶水門口榆皮窰老牛灣紅門鎮邊六口堵塞只准由滑石一口出入擬設檢疫所於該處之觀音寺由馬旅長派軍醫一名前往檢驗等情查該縣所稱防範情

形辦理甚爲妥善合亟通令各該縣一律仿照辦理以杜惡疫蔓延除分電外仰該知事遵照迅卽查明該境究有大小關口若干仿照偏關辦理僅留一口或二口出入設局檢驗餘悉堵塞併將遵辦情形電覆備查 電沿邊各縣知事

疫屍過境查得實情巡警曹安邦仰卽傳諭嘉獎惟屍身包裹衣物等件是否燒化屍親李仲先有無染疫情形已否實行扣留未據聲敘日後倘遇此等情事務須切實辦理萬勿忽小誤大 電崞縣知事

一月十五日

遮斷交通嚴堵各口迭經電令在案乃近據忻崞各縣報告仍多口外行人過境染疫身死情事其爲防檢不力已可概見合再電飭將該縣沿邊各小口一律派警堵絕只留一口通行併於各該關口設立檢查所嚴行檢查併須留驗七日不得以當時查無疫狀卽行放行以致潛伏疫菌在途猝發又將經過地方傳染如巡警不敷分配准其臨時添募總以實行遮斷以防蔓延倘仍防禦不力定行揭參不貸 電第一二防線內各縣知事

承往省北襄辦防疫事宜高誼仁風殊堪欽佩希卽迅赴鴈門關外將沿邊一帶區域嚴行檢驗以杜疫毒蔓延 電忻縣葉魏兩醫士

一月十六日

來電所陳各節應卽切實辦理不惟靈樞病人立須堵截卽行客亦須詢明由口外起程日期合以留驗日期在七日以上以防疫症潛伏越境傳染所須經費先由地方款或雜款內挪用俟規定統一辦法再行電

令 電代縣知事

疫毒流行爲害最烈嗣後各縣如有發生疫症應將所住地點及疫斃人姓名日期隨時列表呈報電第一二防線內各縣知事

一月十七日

侯家口既可控制各處應准設所檢查留住百餘人須詳細查察以防疫症潛伏越境傳染 電河曲知事  
據報該縣阜家坪前次過客患疫症之店於本日下午又疫斃三人尙有一人患病甚重該知事仍舊膜視等語查該店前次既有疫斃之人應立即薰酒封閉將店內居民趕緊消毒隔離計不出此已屬大謬現又傳染疫斃多人該知事尤不急赴直追實屬玩視民命咎無可諉仰卽星夜派人前往將死者深埋病者隔離併查照電令消毒方法切實辦理倘再玩忽宜交孫團長押解來省嚴予參處不貸 電代縣知事

一月十八日

據報該縣對於防疫事宜併未實力奉行殊屬非是仰卽會同魏牧師蘇委員併就近商承馬旅長認真辦理勿稍大意 電甯武知事

一月二十日

檢查舌苔亦証明有無疫症之一助仰參酌試驗惟疫症確無治法已據西醫研究明白至避疫一節只須用淨布袋乾淨棉花紮護口鼻無須用衛生袋等物 電神池蘇委員  
據平魯報稱清水河已現疫症斃三人各該縣均與接壤比鄰仰將沿邊關河津口一律遮斷交通無令偷

越 電河保神五偏各縣知事

一月二十二日

電悉此後應將病者實行隔離未病者實力消防醫治有效者決非疫症各口嚴密堵塞北歸客民一律不准入境 電山陰知事

疫症傳染悉由疫人之呼吸及死者之遺毒所致一經傳染卽無治法防疫之道首重隔離應速設立病院嗣後發現病人卽送病院原住房屋立卽消毒封閉併將家屬隔離 同上

防疫主旨在遮斷交通一經傳染卽無治法北來行旅一律留驗染疫家屬無分親疏實行隔離所以重多數之生命此中用意務使家喻戶曉延醫助理尙屬緩圖積口爲口外商民入晉要隘尤應特別防檢 電離石知事

南來行旅無論何人均應留驗七日至郵差往來郵局訂有按段接遞法如檢查無病卽可放行惟不得越段遞送寄件先薰後拆自係正當辦法仰卽妥慎辦理 電神池知事

一月二十六日

據馬旅長報稱該縣軒崗附近有發疫死者數人外人亦報該境內已疫死三十七人該知事何以迄未據報仰速查明電覆一面將發疫各村遮斷交通遇有病者急速隔離 電崞縣知事

一月二十七日

北曹張北義井既疫死多人迅照前電辦法嚴切辦理召集防疫隊三十名應照准惟疫氛既烈調查掩埋